

CUSSEGL GROND

Sessiun da zercladur 2023

Incumbensa Bavier concernent l'augment da las contribuziuns a las federaziuns grischunas da sport ord daners da la Lottaria naziunala

Il quint economic dal chantun Grischun ha serrà l'onn 2022 cun in resultat surproporziunalmain bun. Contribuì a quest fatg ha tranter auter er la distribuziun dal gudogn da la Lottaria naziunala svizra. En il rapport annual da quella pon ins leger, ch'il chantun Grischun ha survegnì l'onn passà 14,18 miu. francs. L'onn 2018 eran anc vegnids distribuids 10,47 miu. francs. Sin pagina 250 dal quint annual chantunal menziuna la Regenza, ch'i resultia in surpli d'entradas en il sector da la finanziaziun speziala Lottaria naziunala.

L'utilisaziun dals meds finansials dal chantun ord ils daners da la Lottaria naziunala è stada l'onn 2022 la suandanta:

Contribuziun a la cultura 7 860 278 francs

Contribuziun a la Tgira da monuments 1 509 120 francs

Contribuziun al sport 3 911 815 francs

Sin la pagina d'internet dal DECA è menziunadas anc ulteriuras pitschnas contribuziuns che n'han nagina impurtanza en questa constellaziun, sco p.ex. la contribuziun da 319 068 francs a Giuventetgna ed educaziun.

L'entira part dal gudogn da la Lottaria naziunala vegn integrada adina cun in onn retard en il quint chantunal, q.v.d. la cumpart dal gudogn da Swisslos da l'onn 2021 vegn integrada en il quint chantunal dal 2022. 70 pertschient da questa cumpart vegnan attribuids a la finanziaziun speziala Lottaria naziunala (rubrica dal quint 4271) e 30 pertschient a la finanziaziun speziala Sport (rubrica dal quint 4273). Questa repartiziun vegn fatga tenor l'art. 38 da la Lescha da finanzas.

Plinavant pon ins leger sin pagina 403 dal quint annual dal chantun Grischun, che la finanziaziun speziala Sport ha in dabun da 10 137 780, da quests daners èn – tenor infurmaziun dal DECA – 2 411 780 francs gia empermess, q.v.d. 7 726 037 francs èn libramain disponibels.

En nossa societad prestan las 44 federaziuns chantunals da sport cun lur 730 uniuns da sport ina contribuziun essenziala per la promoziun da la sanadad e per la prevenziun e la finala er per l'activitad locala da las uniuns. Sche las vischnancas stuessan etablir ina lavur cun giuvenils consultativa per remplazzar la promoziun da giuventetgna che vegn prestada voluntarmain, chaschunass quai ad ellas custs nunpajabels.

L'Associaziun grischuna da sport cun sias 44 federaziuns da sport e 72 000 commembras e commembers survegn dal chantun per onn bundant 1 milliun francs per la promoziun dal sport. Quest milliun vegn dividì tranter las 44 federaziuns da sport. Entant che las entradas da la Lottaria naziunala èn s'augmentadas marcantamain durant ils ultims 10 onns, èn las contribuziuns a las federaziuns chantunals da sport restadas pli u main tuttina grondas.

En consequenza da la chareschia èn ils custs per la promoziun dal sport però s'augmentads en il decurs dals ultims onns e las uniuns da sport ston oz procurar ils daners per prestaziuns ch'eran en il passà gratuitas u marcantamain pli favuraivlas (p.ex. reservaziuns da pistas da skis, da hallas da gimnastica, da patineras artificialas e.u.v.). Ord vista da las 44 federaziuns chantunals da sport na fai betg senn d'accumular 7,72 miu. francs en il fond da la finanziaziun speziala Sport, entant che las federaziuns da sport cumbattan cun quitads finansials.

La Regenza vegn incumbensada d'adattar la distribuziun dal gudogn ord ils daners da la Lottaria naziunala al sport – analogamain a las contribuziuns a la cultura – e d'augmentar signifitgantamain las contribuziuns annualas a las federaziuns grischunas da sport.

Claustra, ils 15 da zercladur 2023

Bavier, Sax, Candrian, Bachmann, Beeli, Berther, Bettinaglio, Binkert, Bischof, Bisculm Jörg, Brunold, Butzerin, Cahenzli-Philipp (Vaz Sut), Casutt, Censi, Cortesi, Dietrich, Epp, Favre Accola, Föhn, Furger, Gansner, Grass, Hartmann, Heini, Hohl, Holzinger-Loretz, Kappeler, Kohler, Krättli, Lamprecht, Lehner, Loi, Mani, Menghini-Inauen, Michael Beni (Donat), Oesch, Pfäffli, Rageth, Rauch, Righetti, Roffler, Rüegg, Said Bucher, Saratz Cazin, Schutz, Spagnolatti, Tanner, Thür-Suter, Tomaschett, von Ballmoos, Zanetti (Sent)